



## **Messadi per la radunanza communal digls 20 da fanadour 2018**

Stimadas votantas, stimos votants

Suandontamaintg az infurmainsa dallas tractandas, tgi vignan discutadas e deliberadas a caschung dalla radunanza communal digls 20 da fandour 2018.

### **Protocol dalla radunanza communal digls 25 d'avregl 2018**

Digl protocol dalla radunanza communal digls 25 d'avregl 2018 ins ò savia piglier invista u igl retrer durant 30 deis an canzleia communal a parteir digls 4 da matg 2018. Durant igl taimp d'exposiziun èn inoltradas nignas protestas. Igl protocol vign damai declaro per approvo e vign sottacretg digl mastral e digl actuar.

### **Brinzauls: furniziun d'urgenza Vasarauls – credit supplementar 550'000.00 fr.**

A caschung dalla radunanza communal digl anteriour cumeegn da Brinzauls digl 1. da zarcladour 2012, on igls votants approvo en credit brut da 740'000.00 fr. per la furniziun d'urgenza Vasarauls (ava e current electric). Per igl attatg d'urgenza «provedimaint d'ava» eran previas 245'000.00 fr. e per igl attatg d'urgenza «provedimaint electric» 495'000.00 fr. Anfignen alla fegn da mars 2018 èn nias investos 219'000.00 fr. per la furniziun d'urgenza a Vasarauls, radond 144'000.00 fr. per igl provedimaint d'ava e radond 75'000.00 fr. per igl provedimaint d'electricitad. Sen basa dallas circumstanzas tgi s'èn midadas per part, ò igl project digl onn 2012 gia da neir surluvro ed igl ò gia da neir fatg ena nova taxaziun digls costs. Igls novs costs totals eruias montan a radond 1'290'000.00 fr. Da chels èn previas 386'000.00 fr. per igl provedimaint d'ava e 904'000.00 fr. per igl provedimaint d'electricitad. La differenza tranter igl credit approvo igl 2012 e la taxaziun digls costs digl mars 2018 monta radond 550'000.00 fr. La suprastanza communal Albula/Alvra propona da deliberar igl credit supplementar per la realisaziun digl project «furniziun d'urgenza» da 550'000.00 fr.

### **Lescha dall'utilisaziun da prada, pastgiras ed alps aint igl cumeegn Albula/Alvra**

La lescha regla la cultivaziun da prada, pastgiras ed alps an possess da cumeegn, scu er da prada privata. Abitants dallas fracziuns cun dretg d'utilisaziun on la preferientscha digl nez da prada, pastgiras ed alps dallas fracziuns correspondentas. La suprastanza communal

ò la surveglianza generala dallas pradas, pastgiras ed alps da cumegn. Ella pò surdar singuls pensums alla cumischung d'agricultura. La suprastanza communal relascha las determinaziuns correspondentas per la realisaziun, tgi consistan d'ena ordinaziun ed ena annexa tar chella ordinaziun. Chella lescha sottastat agl referendum facultativ. La suprastanza communal decida igl termin d'antrada an vigour da chesta lescha.

### **Chint annual 2017 digl cumegn Albula/Alvra**

Igl **chint current 2017** sera cun en retgav total da 14'513'614.81 fr. e costs totals da 14'221'023.03 fr. cun en surple d'antradas da 292'591.78 fr. Tigls costs totals èn codeschedas amortisaziuns ordinarias da 672'900.00 fr. ed amortisaziuns supplementaras dad 1'100'000.00 fr.

L'atgna finanziaziun per igl onn 2017, an somma da 2'042'115.00 fr., mossa ena reducziun considerabla an cumparegliaziun cun igl onn passo, 3'711'515. 00 fr.

**Igl chint d'investiziun 2017** sera cun expensas da 4'463'143.85 fr. ed antradas da 1'104'874.95 fr., cun investiziuns nettas da 3'358'268.90 fr. Las investiziuns bruttas sa basan agls credits approvos dalla radunanza communal e dalla suprastanza communal.

**Igl chint da facultad per igls 31 da december 2017**, preschainta activas e passivas da 27'037'183.40 fr. La facultad administrativa è s'augmentada an consequenza dallas investiziuns nettas da 3'358'268.90 fr., risguardond las amortisaziuns ordinarias e supplementaras da total 1'772'900.00 fr., per 1'724'802.05 fr. Igl capital agen è s'augmento per 292'591.78 fr.

Digl chint annual 2017 extendia digl cumegn Albula/Alvra pò neir piglia invista sen la homepage [www.albula-alvra.ch](http://www.albula-alvra.ch) u tgi el so neir retratg an canzleia communal a Casti.

### **Provedimaint d'ava: infurmaziuns e rendachint da projects**

An connex cun la realisaziun digl project «sanaziun provedimaint d'ava/ovra hidraulica per ava da Bever Rand, Lantsch – Casti» èn igls projects «colliaziun Alvaschagn» (cumplet) e «colliaziun d'urgenza Vasarauls/Brinzauls» (per part) nias realisos. Igl chints finals ed igl chint intermediar èn disponibel. Igl chints veian or scu suondontamaintg:

#### Sanaziun provedimaint d'ava/ovra hidraulica per ava da Bever Rand, Lantsch - Casti

Igl 16 da fanadour 2012 on votantas e votants digl anteriour cumegn da Casti concedia en credit da 1'200'000.00 fr. – per la realisaziun digl project «sanaziun digl provedimaint d'ava ed ovra hidraulica per ava da Bever Rand». Igl chint final mossa ena part da cumegn per

Casti da 1'331'893.00 fr. Ancunter la taxaziun digls costs digl 2012 sa resulta en surpassamaint digls costs da radond 132'000.00 fr. (11 %). Igl surpassamaint digls costs è d'attribueir tranter oter a prestaziuns supplementaras ve dalla construcziun.

#### Colliaziun Alvaschagn

Per la colliaziun digl provedimaint d'ava d'Alvaschagn alla lengia d'ava Lantsch - Casti, ò la radunanza communal d'Alvaschagn concedia igls 26 d'otgover 2012 en credit da 95'000.00 fr. Igl costs montan tenor rendachint final a 104'361.50 fr.; chegl tgi è en surple da costs da 9'361.50 fr. (9.9 %). La differenza tigl credit approvo schea anc ainten la toleranza da +/- 10 % digls costs approximativs.

#### Colliaziun d'urgenza Vasarauls, Brinzauls

A caschung dalla radunanza communal digl 1. da zarcladour 2012 on votantas e votants digl anteriour cumegn da Brinzauls approvo en credit da 245'000.00 fr. per igl project parzial «colliaziun d'urgenza provedimaint d'ava Vasarauls». Anfignen igl de dad oz è nias investos radond 144'000.00 fr. Sen basa dalla situaziun midada (procedura da concessiun, etc.) è igl project nia sistia. Las lavours duessan neir cuntinuadas e manadas a fegn sot la cundiziun tgi la radunanza communal approvescha igl credit supplementar.

Casti, igls 28-06-2018

La suprastanza digl cumegn Albula/Alvra